



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim




tir yimyim

TAPAK 8

Anurag Jain Niti Aayog
CEO shimogo

Greece nunger forward Tzolis
Arsenal nung denogo



VOL. XXIII ISSUE NO. 281 (ADOK 281) DIMAPUR ROGONÜ (FRIDAY) CHITENI (JULY) 24, 2026

₹ 5.00

Nagaland sorkari terenlok mapa inyakba TV series nung sayutsü

Dimapur, Chiteni/July 23 (TYO): Nagaland sorkari sector balala nung terenlok mapa inyakba sayua special series ka Northeast Live TV Channel nung July 25, 2026 nü nungi sayu tenzüksü.

Iba series nungya episodes ti alitsü, koba Chief Minister Dr. Neiphiu Rio lenisüba kübok state lenla balala nung terenlok aliba sayutsü asoshi yanglu.

Episode shia sorkari sector balala nung terenlok mapa inyakba nung rangloksü aser tang teinyakdak mapa tema sayutsü.

Episodes ya hopta shia Honibar nikongdang 8:30 ako nung sayutsü. Kasa episode ya tasüng, Deobar, nikongdang 4:00 ako nung tanaben sayua tereprangner temi tanaben reprangtsü maongka angutsü.

Yangerjungla Longkumer-i Gauhati High Court nung otsü yanglu

Dimapur, Chiteni/July 23 (TYO): Nagaland nungi Yangerjungla Longkumer, Naga tsür rongnung mezügbuba Gauhati High Court indang Additional Judge mapa agizükogo.

Nagaland Chief Minister Dr. Neiphiu Rio-ia Brehostibarnü Justice Yangerjungla Longkumer nem tenüngsang agüja social media X nung lemsatepa liasü.

Pai iba post nung ashiba agi,

Justice Longkumer iba mapa nung shimba sülen pa den ajurutepa liasü.

La temaba jenjangi atuba ya Nagaland asoshi tongtipang alizüng ka alitsü aser nüburtem aser talisa tetsürtem ajungmesoba mapa ka asütsü, ta ashi.

CM Rio-isa Justice Longkumer obendangba wadang nung maneni takok ngua inyaktsü imlar, ta shia liasü.

DC-i anir ketdangsür temi alinen alua aliba semdang



Deputy Commissioner, Mokokchung, Ajit Kumar Verma, IAS aser Sr. SP, Vesupar Kezo den ketdangsür temi NH-702 nung alinen agi kongshir alirtem den sensaksemba mapang tangokba noksa nung angur.

Dimapur, Chiteni/July 23 (TYO): Deputy Commissioner, Mokokchung, Ajit Kumar Verma, IAS aser Sr. Superintendent of Police, Vesupra Kezo den district administration aser PWD (NH) nungi ketdangsür temi alinen ajanga National Highway-2 kanga mejungi raksar aliba tesemtem Brehostibarnü semdanga liasü.

Chuchuyimlang aser Unger tsüngta NH-2 meters 100 shi anenzüka ogo aser meters 200 shi raksaba ajanga nungdakba osetsüset abenba tsükdaker lir.

Mokokchung, Longleng, Zunheboto aser Tuensang districts tem atema osetsüset abentsü asoshi NH-2 ya kanga tongtipang lir. DC aser SP Mokokchung den ketdangsür temi alinen alua aliba tesem semdanga Chuchuyimlang aser Unger putu menden den

ajurutepa liasü.

NH-2 nung alinen agi kongshir aliba lenmang paidoka gari tilatem senzütsü asoshi district administration aser yimtsüng ana nungi putu menden ajanga lenmang balaka len senzüdaksür. Ajisüaka lenmang kanga temesü asünung, DC Mokokchung ajanga yimtsüng ana putu menden aser ali kiburtem dang ali agüja PWD (NH) nem lenmang ulushidaksütsü ayongzüka liasü.

Yimtsüng ana tsüngta lenmang (NH-2) nung aline onsara tulu aluba ajanga iba lenmang yanglushitsü ita ishika agitsü, ta PWD (NH) ketdangsür temi ashir.

Parnokisa Changtongya Town nungi Longleng aser Tuensang districts leni aoba NH-702 nung alinen alua aliba tesemtem semdanga liasü.

Assam-Nagaland arütsülen sunepa alutsü pangjemtep

Dimapur, Chiteni/July 23 (TYO): Assam aser Nagaland arütsülen külemi teka amteper mita, mapang shia osangtsüsang agitepa aser kati ka dak tamang katettsüsa mera balala agia mangatettep madokdaksütsü aser yimjung nung alitsü asoshi amalitep akatsü pangjemtepa liasü.

Brehostibarnü Circuit House, Dimapur nung Karbi Anglong aser Dimapur nungi district administration ana shisadokden senden amenba mapang iba telemteba ya agia liasü.

Assam delegation ya Karbi Anglong Deputy Commissioner, Aranyak Saikia-i anir civil aser police ketdangsürtem liasü aser Nagaland tenüng nung Dimapur district administration nungi ketdangsürtem liasü.

Arütsülen tebilemtsü balala adokba tekeraba nung aser tesunep nung bentettsü asoshi anatsülen nungi tanen makai district administration aser police forces tsüngta osangtsüsang agiteptsü nungdakba lemsatepa liasü.

Administration ana tesendaktep tajung aliba den mapang shidak nung arütsü tsütsü timtem adokdang Assam aser Nagaland Police nungi telangzüba agütsüba ajanga mangatettep mapang tensa tamajungba mekumdaktsi nüburtem state ana arütsülen kumzüka ayuba ketdangsür temi lemsatepa liasü.

Senden nung Assam nungi revenue ketdangsür temi mangatettep aliba tesemtem indang puti otsütem aser administrative inyakyim lemsatepa, district boundary notifications, revenue records aser census documents tem sayua liasü.

Item yimtsüngtem ya mapang talangka nungi Assam administrative jurisdiction kübok lia arur aser küm aika electoral rolls aser census operations nunga inoka amshia aru ta ashi.

Anatsülen pronglai arütsülen tesunep alitsü ya mezügbuba teinyaktsü asütsüla, ta mulungtepa liasü. Tensa tamajungba mekumdaktsüi

mangatettep madokdaksütsü aser ken o tilateri angatetteptsü aoshi mapang shia senden amentsü aser nüburtem ajurutepa alitsü tim ta parnoki jembia liasü.

Tamang katempa alitsü atema mera agiba nung shilem ka ama ketdangsür temi district ketdangsür, police aser arütsülen aliba yimtsüngtem nungi teshimtet nisungtem densema 'joint border monitoring committee' tentettsü indang parnoki jembia liasü.

Iba committee yagi terenlok mapa tem mita repringtsü, koda masü timtem mapang telangzüba agütsütsü aser tim ketdangsüri arütsü mangatettep mebetet tashi status quo lidakja jembishinü teti alitsü parnoki jembia liasü.

Administration ana yagi akok tashi tongtipang arütsü tesemtem semdangsü jembi.

Assam-Nagaland arütsü nung nüburtem sunepa alitsü mechi maneni jembishinü akatsü, teka amteper mera agitsü pangjemteba iba senden tembanga liasü.

Mkg DEO-i Electoral Roll 2026 Special Intensive Revision indang sangdongogo

Mokokchung, 23rd July (TYO): Chief Electoral Officer, Nagaland-i May 15, 20 26 nü sangdongba nung ajemdaker Deputy Commissioner & District Election Officer (DEO), Mokokchung Office ajanga nübur ajak dang Election Commission of India (ECI)-i Electoral Roll, 2026 Special Intensive Revision (SIR) indang sangdongogo, ta DC & DEO Mokokchung, Ajit Kumar Verma IAS-i osang ka ajanga metetdaksü.

Iba repringshimba mapa ya tongtibangsa temsüa aliba senso shinga mezütoki Electoral Roll nung züngoktsü aser temsüa malirtem(non-eligible) züngtoktsü nükjidong yur inyaker.

DEO office ajanga ashiba agi, Special Intensive Revision ya electoral roll update asütsü aser tashi itshitsü nükjidong nung temsüa alir senso ajak tenüng zülüoktsü saka temsüa malir ajak agiäntsü atema inyaker. Iba jagi electoral database shitak aser ochishia alitsü, ta metetdaksü.

Enumeration mapang (16/08/2026 nungi 14/09/2026) Booth Level Officers (BLOS)-i tsüngtong arua verification mapa inyaktsü aser tang aliba electoral roll nung tenüng agüja alir elector ajak nem Enumeration Forms (EFs) agütsütsü. Elector ajaki

Enumeration Form nung nungdakbatem zülutsü, aser tawa agiba passport size noksa ka inoktsü aser form ji mapang lateta akaba tsüngta BLO ket tongtsütsü.

Claims and Objections mapang (20/09/2026 nungi 20/10/2026) 2005 küm Electoral Roll den sentakteptsü makokba saka Draft Electoral Roll nung tenüng aliba candidate-tem indang kuli tejangia agütsütsü atema Electoral Registration Officer (ERO) mesüra Assistant Electoral Registration Officer (AERO) dangi arua nungdakba kakat dena sayutsüsa akümtsü. Draft Electoral Roll nung tenüng züngoka maliba temsüa aliba nüburtemi iba mapang nung enrolment atema ozüng agüja aliba sangdong (declaration) den nungdakba kakattem ERO/AERO nem agütsütsü akok.

Deputy Commissioner Office & District Election Officer, Mokokchung-i elector ajak dang tsüngtong kidangi verification atema aruba mapang Booth Level Officers den külemi yariteptsü mepishir, ta kasa sangdong nungsa ashi.

Ano Village Council Chairmen, Village Councils, Ward Chairmen, Ward Authorities, recognized political parties, Arogotem, civil

society organizations (CSOs) aser stakeholders ajak dang yamai ashitsü mepishir : mezügbuba nung, Special Intensive Revision dak sentakba nung pepei yimtsüng aser ward nung public announcements, sentep kidang aser tanga local platform-tem ajanga osang agütsüdaksünür.

Tanabuba nung, Kibong ajak dang Booth Level Officers-i ki sema maru tsüngta passport size noksa tasen renema ayutsü metetdaksür aser election nung shilem agitsü temsüa alir shia nem mapang lateta aliba tsüngta Enumeration Form ji renemer agütsütsü ajungshitsü mepishir, ta DEO-isa metetdaksü.

Special Intensive Revision dak sendakba nung teyari mesüra jangjashitsü atema nüburtemi District SIR Help Desk den 8415049315 mesüra 7005473708 ajanga tongteprateptsü akok, mesüra pepei Booth Level Officer (BLO) den tongteprateptsü akok. Ano sensotemi online ajanga Enumeration Form agütsütsü akok, taoba special intensive revision (2005) nungi electors indang osang repringtetsü aser Voters Service Portal ajanga BLO den ajurutsü atema appointment yanglutettsü akok, ta kasa osang nungsa metetdaksü.

(Maneni tapak 2 nung...)

Jangpetkong & Japukong tükong lenmang nung gari tulu senzüba nokdanger

Dimapur, Chiteni/July 23 (TYO): Mangkolemba Sub-Division nung tzünglu tanen makai kanga sashia aruba ajanga lenmangtem kanga sashia raksar senzüsemponger asoshi timtem kumogo.

Aser gari tulutem tanen makai senzüba ajanga ano lenmang tali tamajungba kumdakja nüburtem

takum asoshi lendong ajurutsü kanga mela kumogo. Anungji nüburtem kumzüka ayutsü aser lenmang yanglushiba mapa tetsükdak makai inyaktsü mechi Jangpetkong Range Road aser Japukong Range Road nung gari tulu senzütsü memelar, ta Moakumzük Tzudir, ADC, Mangkolemba ajanga

Brehostibarnü sangdong ka nung ashi.

Item lenmang nung Light Motor Vehicle aser Medium Motor Vehicle kisüng senzütsü melar, aser iba totuyuba ya tarutsü nung sangdong ka magütsü tashi tang nungi amshia alitsü, ta sangdong ajangasa ashi.

Committee on Urban Local Bodies & NVC-i Pfutsero semdang



Nagaland Legislative Assembly indang Committee on Urban Local Bodies and Nagaland Village Councils mendenbuba Advisor, K. Tokugha Sukhalu-i anir committee züngsemtem aser tanga ketdangsürtem Pfutsero semdangba mapang tangokba noksa nung angur.

Dimapur, Chiteni/July 23 (TYO): Nagaland Legislative Assembly indang Committee on Urban Local Bodies and Nagaland Village Councils-i (the Nagaland Municipal Act, 2023 and the Nagaland Village and Tribal Councils Act, 1978, as amended up to 2022) July 22 nü Phek District kübok Pfutsero jila semdangogo.

Advisor, K. Tokugha Sukhalu mendenbuba sür Advisor, Imkongmar; Advisor, Dr. Kekhrielhoulie Yhome; MLA, A. Nyamnyi Konyak; MLA, Dr. Neisatuo Mero; MLA, Y. Lima Onen Chang, aser Khruohituonuo Rio, Secretary-i anir Assembly Secretariat ketdangsürtemi Pfutsero semdanga Nagaland Municipal Act, 2023 aser Nagaland Village & Tribal Councils Act, 1978 benoka inyakba asadangogo.

Iba senden ya Rhosietho Nguori, DC Phek lenisüba nung agi aser Mhalo Humtsoe, A.D.C Pfutsero-i okila jembia liasü. Senden nungsa Ramneek Gautam, S.D.P.O Pfutsero, Vekhrolo Koza. B.D.O Pfutsero, Ketsinle Tep, E.A.C, Razeza, aser Bangjunglemba, E.A.C, Pfutsero nungeri shilem agia liasü.

Kasa mapang nung committee-i Pfutsero Sadar kübok Village Council Chairmen, Village Development Board (VDB) Secretary tem, Pfutsero Town Council Councillor tem aser Gaon Bura tem den sensaksem sentong ka agia liasü. Sensaksem ya iba Act ana benoka inyakba dak rangloker agi, koba tongtumbangsa Pfutsero Town Council aser Village Councils, Civil Administration, service delivery, terenlok maparen balala aser

tekübokba jenjang nung tetsükdaktsü balala ajangshiba dak sendakba nung kati ka den angatettepa inyaktsüba dak rangloker sensaksema liasü.

Stakeholder temi urban governance, sanitation aser solid waste management, infrastructure terenlok, sorkar scheme tem benoka inyakba, financial resources aser Village Council o VDB Secretary tem shilem aser sustainable local governance dak sendakba nung parnok tebilemstütem aser tejangrabatem lemsatepa liasü. Committee-i ken o tem maneni asadangtsü atema kanga junga angaoka yuogo.

Maneni Committee-i, Deputy Commissioner, Phek, ADC Pfutsero, Chairman Mikha Kenye-i anir Pfutsero Town Council aser stakeholder tem ajaki teka amteper inyakba atema kanga pelaba lemsatep.

Finance department-i metetdaksür

Dimapur, Chiteni/July 23 (TYO): Sorkar office tem inyakyim tajungba kümdaktsütsü aser Comprehensive Manpower Rationalisation dak sendakba nung special Working Group ka tenteta department temi staff tem tajungba ketdang asütsü atema Nagaland sorkari tongtimbang jenjang ka agiogo.

Iba team ya State Level Committee on Expenditure Rationalisation and Revenue Mobilization (SLC-ERRM) kübok comprehensive manpower rationalisation dak rangloker inyaktsü. Iba official osang ya Cabinet-i 2026 küm June 6 nü telemtetba agiba sülen Finance Commissioner, Kesonyu Yhome, IAS-i metetdaksüogo.

Tawa tentetba team nung Akunu Meyase, IAS, Secretary to the Government of Nagaland mendenbuba asütsü. Abeinuo Jasmine Ashao, Under the Secretary Finance Department Member Secretary asütsü aser committee nung tanga züngsemtem rongnung Finance Department nungi Vechotsiyi Neinu aser Thejangulie, Law & Justice Department nungi Celine Asino Kulnu aser &AR Department nungi Phajathung Ovung, JSO nunger densema lir.

Iba telok tinyaktsüji sorkar department ajak nung staff kwi ali aji asadangtsü asoshi lir. Parnoki sanctioned posts, tang nisung kwi inyaker aser department ajak nung mapang tazüng kwi ali aji jangja jangja bendentsü.

Parnokisa, mapa talila, overlapping mesüra nüngdakba makaba mapa kecha ali mali aji

bushitsü aser item ajak ya liromedemdaktsütsü atema tebilemba benokdangtsü. Maneni iba telok yagi mapa tasen adokdaktsütsü, mapatem upgrade asütsü aser mapa tazüng alibatam süngdaktsütsü atema inyakyim tapet benoktsü asoshi office structure kanga junga asadangtsü.

Maneni parnoki technology tasen aser computerization ajanga staff nüngdakba dak koda kongshir aji asadangtsü, aser tang tinyakdak alirtemi koda mapa aika arepa inyaktetsü mesüra parnok skill tem arangtetshitsütsü iba indang lenmangtem bushiteta sayutsü.

osang sangdongba anogo nungi tenzüka ita asem tsüngda mapa tembanga inyaker Finance Department nem osang agütsütsü atema Committee nem tetuyuba agütsüogo.

Ken o bushisüngdanga aliba mapang sorkari tetuyuba kar agütsüogo. Cabinet-i tetuyuba magütsüra sorkar department temi mapa tasen madokdaktsütsüla. Mapa tazüng aliba süngdaktsütsü atema Manpower Rationalisation Committee aser SLC-ERRM ajangerang tatembangbuba telemtetba agitsü atema Cabinet dangi abentsü. Ano department temi Finance Department nungi temelaba magi-i parnok staff tali mebendenloktettsü.

Sorkar department, board, corporation aser state meyong company tem dang iba inyakyim nongita yaritsü aser Working Group den parnok staff tem indang osang tejangja agütsütsü mepeshia metetdaksüogo.

Peren DC-i lenmang nung gari anendena ayuba agintsü tuyu

Dimapur, Chiteni/July 23 (TYO): District Magistrate, Peren, Hiazu Meru-i, National Highways nung temelaba maka gari aneba agintsü, asadangtsü atema Standard Operating Procedure (SOP) ka agütsüogo.

Supreme Court-i tetuyuba agütsüba aser Control of National Highways (Land & Traffic) Act, 2002, dak ajemdaker iba SOP ya agütsüogo. Control of National Highways (Land & Traffic) Act, 2002 ya National Highway tem nungi temelaba makai gari anendena alibatam agintsü atema District Administration, Road Agency (NHIDCL/PWD (NH)), State Police aser State Transport Department nunger angatettepa inyaktsü atema yangluba lir.

Mapa benoka inyaktsü aliba team nung Additional Deputy Commissioner, Peren (HQ)/ Additional Deputy Commissioner, Jalukie; Additional Superintendent of Police, Peren; Regional Transport Officer, Kohima i/c

Peren; Executive Engineer, PWD (NH), Kohima i/c Peren; Extra Assistant Commissioner, Peren; Extra Assistant Commissioner, Ngwalwa; Office-in-Charge, NHIDCL, Peren; aser PA to DC, Peren nunger densema alitsü. Iba team yagi Peren district kübok NH 129A nung KM 109.494 nungi KM 173.850 tashi ayimjema inyaktsü.

National Highways/ Expressways nung temelaba makai gari anena aliba tesem indang GPS-stamped noksa kuli agütsütsü atema NHIDCL aser PWD (NH) patrolling unit aser State Police patrol team tem nüngdaktsü.

NHIDCL aser PWD (NH) nati Control of National Highways Act, 2002 dak ajemdaker preliminary notice ka agütsütsü aser anogo tenet tsüngda garitem agintsü asoshi metetdaksütsü. Iba tetuyuba indang copy ka District Magistrate nem agütsütsü.

District Magistrate den State Police-i ozüng alema gari anena

alibatam agintsü asoshi jenjang agitsü. Maneni aibelenra gari ya State Police-i achaayanga road agencies' crane aser machinery tem amshia atakzükja aliba tesem kati bener aotsü.

Bendena aliba kulitem ajak idangjisa Designated Police Officer (DPO) dangi yoka e-challan agütsütsü aser patrolling unit temi iba tesem nung manual challan kecha magütsütsü, koba centralised aser transparent digital record ka asoshi lir.

Peren District Police aser line department temi aibelenertem putettsü atema video camera amshia Advance Traffic Management System ka amenoktsü. Video tem ya Police Department dangi indang indanga yoktsü.

Maneni itashia District Highway Safety Task Force senden amenba mapang jenjang balala agiba indang osang agütsütsü. NHIDCL aser PWD (NH) nati km 75 tsüngda recovery crane tem renema ayutsüla.

DWSC Kohima-i JJM, SBM(G) inyakyim lepa reprangshi

Dimapur, Chiteni/July 23 (TYO): District Water and Sanitation Committee (DWSC), Kohima senden ka July 22 nü Additional Deputy Commissioner, Kohima office nung menogo.

Iba senden ya ADC, Ruopfukuotuo Noudi lenisüba nung amen aser pai Ministry of Jal Shakti-i yokba shiti zünga metetdaksü. Pai züngsemtem dang district-i taoba küm DWSC senden indang minutes upload mesütsü ta metetdaksü. Paisa, meeting minutes mapang shitak nung upload sütsütsü nüngdakba lemsatepba den water quality testing inyakyim indang ashishia liasü.

ADC-isa, line department ajak dang water & sanitation programme tem ajak takok ngua benoktsü atema tajungba sendaktepa inyaktsü ayongzüka liasü. Ano pai Jal Jeevan Mission (JJM) inyakyimtem terenlok asadang aser ketdangsürtem nem parnok mapa tajung asoshi tenüngsang agüja liasü.

Senden nung Executive Engineer, PHED Rural Division, Kohima-i, Jal Jeevan Mission (JJM) terenlok indang metetdaksü, koba yim dak yimtsüng nung kibong ajunga nem pipe ajang tzü agütsütsü asoshi lir. Kasa mapang nung Swachh Bharat Mission (Gramin) [SBM(G)] koba ODF Plus yimtsüngtem ajanga sustaining sanitation ajangzüktsü atema rangloker inyaker iba indanga metetdakja liasü.

JJM kübok yimtsüng 66 nungi 35-ibo kibong shia pipe line ajanga tzü agütsüba osang agütsüogo aser tanungba maparen ya

December ita tashi nungbo tembanga inyaktsü nükjidong yur inyakdar.

SBM(G) kübok yimtsüng 63 nungi 46 Open Defecation Free (ODF) Plus Model villages ta sangdongogo aser tanungba 17 nunga December ita tashi nungbo maparen tembanga inyaktsü rangloker inyakdar.

Senden nungsa tang Jal Jeevan Mission infrastructure data integrate süa online portal nung upload sütsütsü atema inyaka aliba indang sensaksema liasü. IEC inyakyim ya mission indang tangazükba agütsütsü atema June 1 nungi 5 tashi benoka inyakogo ta metetdaksü aser JJM benoktsü atema Rural Development Department dang teyari meshia liasü.

Maneni department-i, senotsü agi anüngba aser tinyaktsü aika asüba ya iba sentong benoka inyakba nung tetsükdaktsü tulutiba lir ta metetdaksü. Kohima district nung Jal Jeevan Mission shilem 90 bo tembanga inyakogo aser medical centre tem nem pipe line ajanga tzü agütsütsü asoshi rangloker inyakdar, ta department-isa shisem.

Kasa mapang nung School Education Department-i, district kübok yimtsüng nung aliba school 93 densema school 116 aliba nungi school 55 nembo tap water connections agütsüogo aser tanungba school tem ano mayimjemi lir, ta ashi. Tanungba school tem dak sendakba nung School Education Department-i tap water connections nüngdakba school tem indang list ka benoktsü asoshi committee-i telemtetba agia liasü.

Mkg DEO-i Electoral Roll 2026 Special Intensive... (TAPAK 1 NUNGI...)

Nagaland nung Special Intensive Revision sentong yamai alitsü:

ACTIVITY	SCHEDULE
Preparation, Training & Printing	05 August-14 August 2026
House-to-House Verification by Booth	
Level Officers (BLOS)	16 August-14 September 2026
Rationalization of Polling Stations	By 14 September 2026
Publication of Draft Electoral Roll	20 September 2026
Period for Filing Claims & Objections	20 September-20 October 2026
Disposal of Claims & Objections	20 September-18 November 2026
Publication of Final Electoral Roll	22 November 2026

Quad senden nung Indo-Pacific atema jemb



July 23, 2026 nü Manila, Philippines nung 33buba ASEAN Regional Forum (ARF) Ministerial senden aliba mapang Union External Affairs Minister, S Jaishankar aser Bruneian Prince Abdul Mateen na leniba nung jurila senden ka amenba noksa nung angur.

New Delhi, July 23 (Agencies): Bodhbarnü Manila nung Quad senden nung India external affairs minister, S Jaishankar-i Quad foreign minister tem den East China Sea aser South China Sea tensa atema o lemtepo.

Iba senden nungji Japan Foreign Minister-i, linük kati dang pei melungba nung tashiyim amshia inyaksangshiba ajakji anema nokdaksü, ta metetdaksü.

South China Sea dak sendakba nung China aser Philippines na tsünga mangatettep aliba mapang ka nung Quad senden menogo.

Quad tentet nung züngsem linüktemji Australia, India, Japan aser US lir, aser taküm tang agi tanabenbuba parnok senden menogo. Taküm May ita nung Delhi nunga Quad foreign minister tem senden mena liasü.

Manila nung ASEAN dak sendakba nung Jaishankar, US Secretary of State Rubio, Australia Foreign Minister Penny Wong aser Japan Foreign Minister Toshimitsu Motegi nung senden amenba sülen parnoki külem sangdong ka ajanga Indo-Pacific nung teladak asütsü aser ASEAN longjema alitsü atema inyaksü,

ta metetdaksü.

Parnokisa, Indo-Pacific tzüym nung yimjung aser security alitsü; region nung azükaru atema longjemer inyaksü, ta metetdaksü.

"Onoki region nung takok angutsü atema inyaker. Iba denji külemi ASEAN aser züngsem linüktem den amalitepa inyaker," ta parnokisa metetdaksü.

Tzüym nung security, rongsenkettzüng security, technologies aser ASEAN Outlook on the Indo-Pacific (AOIP) mapa küma benoktsü atema maneni inyaksü, ta parnokisa metetdaksü.

Longkak aiterem den jembitsü melunga dang lir: JP Nadda

New Delhi, July 23 (Agencies): Centre sorkar tenü nung longkak aiterem Cockroach Janata Party den jembir Union Health minister J P Nadda-i, longkak aiterem den jembitsü atema sorkari melunga dang lir, ta metetdaksü.

Paisa, Parliament nung iba onük nung o entepba mapang Centre-i telangzüba ajak agütsütsü, ta metetdaksü.

Osangbenertem den jembidang Nadda-i, NEET-UG paper leak asüba nung ajemdaker Congress lenir Rahul Gandhi-i yimtenren tsütsü tajangzüng angutsü atema inyaker, ta ashi.

Nadda-isa Congress mesüra opposition party tem sorkar menden nung aliba

mapang state aika nung exam paper leak asüba tatalokbatem metetdaksü.

Dharmendra Pradhan menden nungi anentsütsü atema takhangba agütsüba atema sorkari o lemtepdar asü?, ta asüngdangba langzüdang Nadda-i, "Masü, iba amaji inyaksangshi masür. Onoki o lemteptsü atema melunga dang lir, saka ibaji Parliament nung asütsüla. Parnoki parnok tebilemba lemsatepogo. Sorkari telangzüba agütsütsü," ta metetdaksü.

Nadda-i opposition party tem danga paper leak asüba onük ya yimtenren onük ka mekümdaksütsüla, saka iba tebilemtsü onük ya teti atema bentettsü atema sorkar den jembitsüla, ta metetdaksü.

Nadda-i, CJP-i akhangba onüktem atema pai telangzüba agütsüogo aser maneni parnok den jembitsü melunga dang lir, ta ashi.

Ano külen Defence minister Rajnath Singh-ia, opposition party temi parnok tebilemba ataloktsü atema lanurtem ya yimtenren hadir ka ama amshitsü meranger, ta aitsü.

Rajnath-isa, Jantar Mantar nung lanurtemi mapang talangka longkak aitba atema tebilemtsü katsür aser lanurtem tebilemba ataloktsütsü atema sorkari inyaksü, ta ashi.

Opposition aija Rajnath-i, opposition party temi iba onük ya Parliament nung bentettsü melen lenmang nung ang bentettsü merangba yabo tai, ta metetdaksü.



July 23, 2026 nü New Delhi nung Parliament House complex nung Lok Sabha nung opposition lenir, Rahul Gandhi, Samajwadi Party (SP) Tir Akhilesh Yadav, Congress lenir Jairam Ramesh, TMC lenir Saugata Roy aser Sagarika Ghose na, JMM lenir Mahua Maji aser opposition INDIA teloktep nungi lenirtem senden amendang tangokba noksa nung angur.

Kashmir nung kiralongrar ana meyong ki poksatsü

New Delhi, July 23 (Agencies): Bodhbarnü South Kashmir kübok Anantnag district nung kiralongrartermi police amakdang police ka khasetba sülen security sepaitemi aonung piyong kiralongrartermi mita ao aser Brihostibarnü kiralongrar ana meyong ki poksatsüogo.

LeT kiralongrar, Adil Ahmad Thokar'er ki bomb amshia poksatsü. Tapoktsü tesashi amshiba ajanga anasa aliba kiojen kar tera raksaba den külemi anasa anena aliba gari ka raksa.

Yaküm April ita nung kiralongrartermi Pahalgam amakba sülen-a ketdangsertemi

Thokar'er ki raksaja liasü. Ita ishika tejaklen ang par kibongi ki tasen ka süa liasü.

Brihostibarnü saketdangsertemi LeT kiralongrar, Haroon Rashid'er ki-a poksatsüogo.

Adil aser Haroon naprongla 2018 küm nungi kiralongrar telok nung dena liasü.

Bodhbarnü Anantnag nung kiralongrartermi police team ka amakba mapang nung Head Constable, Ashique Ahmad Qureshi asü. Iba sülen nungjagi Jammu & Kashmir Police aser security sepaitemi

kiralongrartermi mita ao aser Over Ground Workers (OGWs) 200 shi pua asüngdangyaogo.

Anurag Jain Niti Aayog CEO shimogo

New Delhi, July 23 (Agencies): Centre sorkari 1989-batch IAS officer Anurag Jain, küm ana atema Niti Aayog Chief Executive Officer (CEO) shimogo.

Jain ya tang Madhya Pradesh nung chief secretary teinyakdak lir.

Taküm February ita nung Niti Aayog CEO, BVR Subramanyan kümsük tembangba sülen tang tashi toklang CEO mali.

Jain ya ministry balala aika nung inyaka aruogo. Küm ter tejaklen PM Jan Dhan Scheme tenzükbba mapang nung pa department of financial services nung inyaka liasü, iba sülen PM's Office nung inyak, iba sülen DDA vice-chairperson inyak.

Pa Promotion of industry & internal trade department nunga inyak aser transport & highways ministry nunga secretary inyakogo.

CJP-i tanü linük tesem ajaklen longkak aittsü ayongzüker



July 23, 2026 nü Jantar Mantar, New Delhi nung Cockroach Janta Party (CJP) national otongdar, Ashutosh Ranka-i osangbener ka den jembidang tangokba noksa nung angur.

New Delhi, Chiteni/July 23 (Agencies): Cockroach Janta Party (CJP)-i Hokolbarnü (July 24) linük tesem ajaklen longkak aittsü ayongzüka kaketshirtem aser lokti tentettem dang police-i longkak aiter kaketshirtem dak tashiyim amshiba anema kaketshirtem pusema district ajak nung longkak aittsü mepishia metetdaksü.

CJP-i parnok indang official social media accounts ajanga linük tesem ajaklen "Every District. One Day. One Demand" yimyim nung ajemdaker longkak aittsü metetdaksü.

NEET paper leak asüba aser exam balala ketdangsüa agiba nung ochimashi anema longkak aiter kaketshirtem dak police-i tashiyim amshiba anema kaketshirtem pusema tesünap nung longkak aitba nung shilem agidaksüner, ta CJP-i metetdaksü.

CJP-isa kaketshirtem tentet aser organisations balalai amalitepa iba sentong

ayongzüksü, longkak aittsü atema district ketdangsertem dang nüngdakba temelaba meshitsü aser tesünap nung longkak aittsü metetdaksü.

CJP-isa, longkak aitba sentong ayongzükertem yarisemtsü atema standard operating procedure (SOP), campaign materials aser temepishiba shidi parnok indang website nung upload süja lir, ta metetdaksü.

Delhi nung CJP-i 'Sansad Chalo' ayongzüka longkak aitba mapang nung tesem aika nung longkak aiterem aser police tsünga raratepa liasü. Police-i longkak aiterem dak ajok agi azük, tear gas khaloktsü aser tatalokba kar nungbo rubber bullets khaloktsüba osang lir.

Ano külen tesem kar nungbo longkak aitertemia police aika yiruja liasü.

CJP-isa Union Education Minister Dharmendra Pradhan menden nungi manentsü tashi parnoki longkak aittsü, ta metetdaksüogo.



TIR YIMYIM YIMOBILEM (EDITORIAL)

DIMAPUR FRIDAY, JULY (CHITENI) 24, 2026

Mapa renema meinyakteter

Nagaland nung ya sen aser chi makaba tebilemtsü aser timtem masü saka kari mapa junga meinyaker aser kari mapa renema meinyakteter ta asüba timtem agi asenoki meteta aser memeteti timtem takoksa ajurudagi. Aji oda, yakanü Kohima nung government nung tongti ketdangser tulurtem senden ka nung Development Commisisoner-i Nagaland state government kübok department aikati India government nungi terenlok mapatem inyaksü asoshi sen lemzüksüba magiteti meyipa yokba tamakok aser takoksa indang ashibaji, asenok ajak asoshi tesasatsü osang ka dang masü saka India government tsüngdang taaktsü mapa ka lir. Aji oda, Nagaland nung terenlok mapa meinyaktetba ya sen maliba agi masü saka asenoki mapa shitak meinyakba ajanga lir, kechiyong tanü putu nungbo mapa meinyakertem nembo sen magütsür. Atangji, taoba putu nungbo asenok aika mapa meinyak ser takar kümogo aser tazünga junga mazüng aser tatidanga magütsü ser government mapa tajung anguba purtema aika lir. Itemji shitak ama asenoki bilem, anungji ajaki akok tashi mapa meinyaki takar akümtsü aser tatidanga magütsüi government mapa angutsü merangtep, ajisüaka item mapatem to shitak masü asü, anungji temoatsü melen tanü putu nung lanurtem timtem ajuruba asenoki angur. Aji oda, contract nung terenlok mapatem inyakba nunga asenoki dang inyakner, aji shitak, saka asenoki inyakba mapaji kata shitak meinyaker aser mapa aika merenemtet inyaktur toktsür. Aji oda, lenmanga asen lima nung asenoki inyakba lenmangsa temelaba raksar aser kiojena shitakbo kata merenemtet ser asen lima maparen aika nung akoksadagi. Atangji, ibaji teinyakertem kisüng taibo masütsüa akok, kechiyong mapa metenzük dang yongi temaba menden nung mena alirtem nungi tenzüka telongba menden nung mena alirtemi tashi pei pei shilem angati sen meshir, anungji mapa inyaksü senbo manünger. Ibaji kodang bilemdangdir, terenlok mapa junga meinyakba aser mapa merenem ser toktsüba atemaji inyakertem aitsütsü melen, ano, parnok dangang meima bilemtsüsa akümer. Tanü asenok iba ama tensa mapang ka nung Nagaland nung alir. Aji oda, tanü asenok nübortem asoshi yanglutsüba lenmang, apu aser ki kar junga meyanglutet aser kar merenemtet toktsüba ajanga asenoki meteta timtem tulu ajurur. Itemji asenoki memeteti atalokba mapatem masü, kechiyong item terenlok mapatem ajakji asen nük agi ngua yanglur, ajisüaka asenoki tangar asoshi yanglutsür amai bilemer, ibayongji majung yanglua anguyonga ola madoker aser merenemtet toktsüyonga kecha hau ta mali. Iba jagi küm shia Nagaland nungibo terenlok mapatem shitak meinyaktetba agi Delhi-i sen meyipa yoker. Tangarbo mapa ka jungjunga renemli, ano mapa tuluba ka atema sen teimba meshir inyakli ta pei lima renloket renloka nübortem anisüngzükdaktsür, saka asen lima nungbo mapa ka inyaketli sen meyipa yokli ta lia lia kecha maka, alima tazüng, kümdagi. Iba tensa tiaji asenoki yanglushitsüba dang !

OLEMSABANG

Amhola aser Jubangtsü otsü

~ Repalemba Imchen, Kohima (Source : Nokinketer)

Tsüraburi shia aruba tar nunger otsü aika liasü. Item rongnung, parnoki shia aruba otsü ka, Amhola o Jubangtsüng na otsü yaa ka lir.

Otsüji ya:

Amhola dang tetsüi pei pur bendanger ki-i maotsü shia liasü. Saka lai tsürabur o manga, bendanger densa lembunü. Bendanger ka tenüng Jubangtsüng liasü. Jubangtsüng tereprangtsüji, aso tajung, tobur tajung sentsü tajung, tetemsü nisung asangur amai liasü. Tetsüi Amhola dang, nenok kibong nung moa-a dang liang ta moatsü yok.

Parnok ajak yim balala nung alir asünung, lar tsüraburi, par kibong tiaji memetet mapang kar süidaktsü. Lar tsürabur kiji yim linti anasa liasü. Kechiaser, parnoki osangtsüsang ajak, jet-jet ta meteter. Amhola o Jubangtsüng na kibong nung jala, jabasotem aso. Yimertem, oli-orar, hingwa warer-rarer ajaki, Amhola tetsü dangji, lar chirtemji tereprangi aotsü shia liasü. Ibaji par yimeri dang masü, temeket kishikinar yimtsüngtemia, kibong otsüji tetshia jembitep. Item shin-shiko, angashia tetsüji maremtet semchirtemji tereprangi ao. Lenmang len pafia-i (talang) liasü.

Tetsüji, Amholar ki tonger la dang par semchirtemji kong lir repringtsü ashi. Lai, la dang ali chipo nung mekümbanger lirji, repringang ta agütsü. Nembanga aliba chipoji lapoker repring nung, Amholar chirtemji, tesempatsü shiruru, pongli-pongdingi (insect) chanutem, sangken chanu, koya chanu, ketsüng chanu, sosang chanu, sorak chanu aser leplo chanutem liasü. la tekati ayaketa atu. Yea ! Yea ! yea! Tesempatsü, tesempatsü, tesempatsü, semchirtem ta menokzüka yok. Idangji kar tetsüng menoktok. Itemji tsüngtsüker aküm. Kar teka nung menokshi. Itemji ketjaker aküm. Kar tokolak nung kongshi. Parnokji lemtamatar (nükpoker, narong tsüker, temeli tatsük, soar, yiamatar) aküm aser kar menungset. Parnokji süatok.

Tebuba Jubangtsüji mapaa kecha meinyak odang kazüa liasü. Tetsü jagi tebura mapa kecha meinyaki alir no? alui oang, mapa inyakang ta arja ashi. Tartsüba marem, Jubangtsüji, kenübo alui ao. Yimer lu nung, inyakteta aliba mo, tsünüteta akaba züngi, mendi, mersü, amala tsünüsempongtsütem ngua mekokaji tenzü.

Alu nungertem, alu temsentepa kidangi adok. Saka Jubangtsüngbo menua madok. Amhola tetsüi Jubangtsüng lenji aotsü ashi. Lai tou ta langzü. Odang odija ta maneni tetsüi shijen ashi. Süra, yim süngkhüm atena tou ta shir yok. Anülü mapang, saka Jubangtsüng madok asü. Ya kechi ta, süngkhümü atena odang. Idangji Jubangtsüng jagi per tulu ka kümer adoka liasü. Lai, pa angudangbo, per jagi la meyoker liasü. Saka, pa süngkhümi aidangbo nisung kümer kidangi adok. Jubangtsüng dang Amholai, Kütsübo na lenji-i ogo, la kong lir ta asüngdang, saka Jubangtsüngi la mangu ta langzü.

Jubangtsüng tebok tuluka waker ngua, “kütsü to pai chia lir ta metet”. Laia meima dang nasem (au agi yangluba kotari techira) ka bener arua Jubangtsüng tebok nungji jiter (ranger) yutsü. Idangji tetsüji “ Okhi” Amhola tetsü ta noktaka ken yamai aten.

“Amhola nü la

Changki po ka tetepsen

Ali po ka tetepsen

Kang-kang maluli

Ajip in nü fufu zakru za”.

Tangatetsü

Amhola = Ibai shiruru pongli-pongdingi (insect) tila. Puja adoker. Süngdong, süngzü amala nungsa tema angur. Tashikang tener. Parnoki, parnok sasa parnok puja jagi, parnok temang nembanger.

Jubangtsüng = Tamagitsü shirurutem dang ajar. Nisung achiba taküm.

Tetsü = Sayutsünger.

Nasem = Sarasadem

Okhi = Mechi amerang noktaktetba pur.

Tsüraburtem, tar nunger otsü nungi tangateter ka küma liasü. Aji oda, parnok tasütait, ochi nung noktaka mapang ajak ajurua aru. Kari mangatetra Amhola o Jubangtsüng na chirtem ama, rong nungi ka asütsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Goa nung Tenla ki anasa project ka anema longkak ait



July 19, 2026 nü Goa nung Aso 16buba mapang Portuguese nungertemi asüba Tenla ki anasa kiojen asüba anema Khristantemi longkak aitba noksa nung angur.

July 23, 2026: July 19, 2026 nü Goa nung Aso 16buba mapang Portuguese nungertemi asüba Tenla ki anasa kiojen asüba anema Khristantemi longkak ait.

Tenla ki anasa ali tua kiojen asüba ajanga ali tashi meiti küm daksütsü aser ibaji ajanga Tenla ki-a kongshitsüa akok, ta Khristantemi bilemer.

'Capela da Nossa Senhora do Monte' ta ajaba Tenla ki ya Se Old Goa Village nung tenemlen lir, aser iba ya UNESCO-i recognise asüba heritage site ka lir.

July 19 nü Save Old Goa Action Committee-i ayongzükbä sentong nung shilem agirtemi sorkar ketdangsertem dang Tenla ki anasa terenlok mapa inyaksü atema temelaba agüja aliyonga tangsa kiojen asüba mapa ajak anenadoktsüla, ta takhangba agütsü.

Save Old Goa Action Committee nung züngsem, Vincent D'Silva-i, 2024 küm

Goa Town & Country Planning Department-i iba Tenla ki anasaji farmhouse asem asütsü atema temelaba agüja liasü, ta metetdaksü.

"Ajisüaka onoki tashishiba metetdakja longkak aitba sülen kiojen asüba mapaji anena liasü," ta pai metetdaksü.

Ajisüaka tawa Arogo li ajangadanga kiojen asü dang amshiba osettsüset belenba metetba sülen onoki asentenshir longkak aiter, ta pai metetdaksü.

Iba tesem nungji mapa inyakertemi tzü rizüngba 'tank' ka amenokogo.

"Iba tesem nung kiojen asüba mapa kar danga inyakra UNESCO heritage site ya agienadoktsüa akok," ta pai ashi.

Old Goa nung sarpanch, Medha Parvatkar-i, küm ana tejaklen kiojen asütsü atema temelaba agütsübaji agienogo, iba sülenjibo temelaba magütsü, ta metetdaksü.

2024 küm iba tesem nung

farm house ana asütsü atema temelaba agütsüba sülen yimtenren lenir, Glean Cabral-i mezüng tashishiba ken o agüja liasü.

Cabral-i, "Mount Mary Chapel (Tenla ki) anasa moapu nungji terenlok mapa kar danga tenzükra ibaji ajanga iba tesem ajak nung kiojen asü tenzüksü aser 'developers' nem agütsütsüa akok. Ib ya tebilemtsü onük tuluka lir," ta ashi Iba Tenla ki ya Portuguese nungertemi asü aser 1519 küm renema liasü.

1510 küm Goa maakdokba sülen Portuguese India nung mezüngbuba governor general, Afonso de Albuquerque-i iba Tenla ki asütsü tetuyuba agütsü aser küm 9 tsüngda renema liasü.

2001 küm tashi nungbo iba Tenla ki mejungi raksa ajisüaka Fundaêco Oriente organization-i senotsü tenla agüja Goa state sorkar den senteper yanglushia liasü.

Iraq Ato kilonseri Khristantem dang linüki meyipa arutsü mepishir

July 23, 2026: 2003 küm US leniba nung sepaitemi Iraq nungi tashi tali amshia yimsüsür Saddam Hussein atsüngdok aser 2014 küm nungi ISIS kiralongrartem merenba mapang Khristantem aikati iba linük toktsür jena liasü.

Iraq nung Khristan nütsüng million 1.5 liasü saka ISIS yimsüsüba mapang nung Khristan nütsüng 250,000 shi dang aküm.

Tang Iraq Ato kilonser, Ali al-Zaidi-i Khristantem dang linüki meyipa arutsü ajungshir.

Khristantem meyipa arudaksütsü atema sorkari Khristantem dang health services aser shisaliok agütsüba den külemi ali-a lezmüksütsü, ta nangzükgogo.

Nirij Organization-i ashiba agi, item ama tenangzükbä m e t e d a k t s ü y o n g a

Khristantemi meyipa marutsüa akok, kechiyong sorkari nüburtem kümzüka alitsü atema meinyakteter aser ozüng mebenokteter, ta metetdaksü.

Khristan temeden atema inyakertem-i, yimsü alia amangertem dang nungi Khristantem kümzüka mali, iba denji külemi Khristantem aikati tamalen parnok meyong kiojen meyipa aginer, ta metetdaksü.

Muslim nunger nütsüng teimba aliba linük nung Khristantem kanga bendanga züngshir aser yimtenren nunga menden shidak melemzüksür.

Syriac Orthodox Archbishop of Mosul, Kerkheslokh (Kirkuk) aser Kurdistan Region Mor Nicodemus Daoud Matti Sharaf-i, "Linük nung tebilemtsü onüktem bentettsü

atema kecha meinyaki Khristantem dang meyipa arung, ta ashiba jagi kecha mesütettsü," ta ashi.

Ano külen, Khristantem dang meyipa arutsü ajungshiba ya Iraq ketdangsertemi US Tir, Donald Trump den tesendaktep yanglunüba agi asütsüa akok, ta bilemer.

Evangelical Khristantem aikati Donald Trump pusemer, aser ibaji ajanga Trump-i linük balala nung Khristantem temeden atema inyaker.

Trump-i Nigeria nung Khristantem jenti tepsetba nokdangtsü atema Nigeria ketdangsertem ajungshia arur. Tang tesüsa Trump-i China Tir Xi Jinping dang Khristan lenir kar chioktsü mepishiba sülen July ita tetenzüklen China nung pua aliba pastor ka densema Khristan lenir kar chiokogo.

ANOGO ABEN TSÜNGREM DEN

Nai kong repranger?

Peteri tejak meyipa, nütsüng shiba Yisui meim aser ano shibai aonung chiyongdang Yisu teku nung metaloker... Kibuba, aser iba nisungi kechi asütsü? Yohan 21:20-21.

Tsüngremi ne den jembir külen mezüngbuba nai inyaksüba lendong lir. Yisui Peter dang pai kechi mapa inyak aser koba tasü agi pa asütsü iba indang ashi (t.18-19). Peter taküm nung ibai temeshi mapang ka liasü. Pa kiburi pa dang tarutsü taküm indang ashi. Pa takümü jangratemtsü taküm ka masütsü saka pa Kibur aser Masteri shimtetba aser moatsüba taküm.

Yisui pa dang ashiba langzütsü melena pai pa meketa alirtem reprang. Pai Yohan ngushi, shiba dang Yisui meim. "Saka Kibuba, iba nisung koda?" Peteri asüngdang. Peter dang pa kechi tasüba agi asütsü iba indang Yisui pa dang shir liasü. Pa mapa tangar den medemdangtsüji koda yimya liasü! Tsüngrem tenzükertem asoshi ibai tatitangba tulu liasü. Tsüngremi kü tembar nem ki tuluba agütsü asü? Tsüngremi kü tembar temeimba anebtsü saka nibo manebtsü? Tsüngremi tembar dang junger nung dang yutsür asü? Tsüngremi tembartembo kibong anasa alitsü mela saka nibo talangka yok ?

Yisui Peter aser Yohan lenmang balala nung jajatsü mela. Yisui Pa tenzükeri pei tenük pa master dak masü tangar dak ranglokbaji koda lendong aji metetta liasü. Nai kong rangloker? Nai Tsüngremi ne den sendaktepa aliba nungi tangar dang inyakba tali bilemer asü?

Pastor kati nisung 175 baptitsüba sülen nisung kari pa khaset



Crépin Martial Monga

July 22, 2026: Central African Republic nung arrshi küm 36 pastor kati nisung 175 baptitsüba sülen anogo ka dang lirbo nisung kari pa khaset.

Pastor Crépin Martial Monga ya Zemio nung aliba St. John the Baptist Arogo nung Vicar liasü. June 29, 2026 aonung pa kidangi meyipa aoba mapang 6:40 ako meta pa khaset aser pa den külemi alisang Arogo nung züngsem ka mejungi yiru.

Anogo ka jakdang Monga-i nisung 175 baptija liasü, aser iba nungjagi parnok 160 bo par Arogo nung tamangertem liasü.

Mbomou ayongküm nung ghonda aika pai nisung 175 baptitsüba sülen anogo ka dang lirbo prangpong amer nisung kari pa khaset.

Tang tashi nungbo pa

khasetertemji shirnokar mejangja. Bishop Aurelio Gazzera densema Arogo nung lenirtemibo, prangpong amer telok aika aliba tesem aser rara kanga bulua atalokba tesem ka nung Monga-i yimjung atema inyakba agi pa khaset asütsüa akok, ta metetdaksü.

Gazzera-i, "Mapang ka nungbo pa leniba nung Arogoi refugee 3,000 dak tali yaria liasü. Iba mapa ya kanga tongtibang liasü. Iba dak alia pai prangpong amer telok aser sorkar ketdangsertem den mapang shia jembia rara anentsü atema ajak den jembia aruogo," ta metetdaksü.

Pastor Monga-i region nung yimjung atema kanga meranga inyakogo. Pa Local Committee for Peace & Reconciliation nunga züngsem liasü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Zonibang

(adv) anübang, anü adokli (time of sunrise)

* Anepdang shia onok zonibang nungi mapa inyak tenzüker.

Zonizüing

(n) ita anogo azüingba (calendar)

* Aor zonizüing Aenjeti nungi tenzüker aser Luchii nung atemer.

OLONG PAITEP # 7576

1		2			3		4		5
				6		7			
8									
						9			
			10						
11									12
					13			14	
15									
16								17	

TIPLIN

- Nüji masü - (4)
- Techinütsüka - (6)
- Aketa shirangba - (5)
- Pi - (6)
- Amena - (5)
- Kinü - (5)
- Tanang masü - (5)
- Lenmang - (6)
- Nübo tedi - (5)
- Tuoshi - (6)
- Shiruru apuba temenatsü - (4)

LANGTSÜNGLEN

- Jila tulu - (5)
- Sarasademdang tembang - (4)
- Tarutsü indang ashitem - (6)
- Alia - (5)
- Mojing - (5)
- Tai inyakba metet - (5)
- Medemer chijiba - (6)
- Tatokba / Amadok - (5)
- Anüngdang masü - (5)
- Jabaso masü - (4)

OLONG PAITEP # 7575 TELANGZÜBA**TIPLIN :**

- Tesangra, 5. Mungo, 7. Kisen,
- Salem, 12. Semki, 14. Kilem,
- Kensü, 16. Sangpang.

LANGTSÜNGLEN :

- Temesen, 2. Raksa, 3. Aon,
- Aso, 6. Nile, 9. Alizüing,
- Omen, 11. Lemta, 13. Ola, 14. Kin.

NAI-A YA METETTER

Harare nung Zimbabwe den mezüingbuba T20I asayaba mapang Vaibhav Sooryavanshi-i otsü tasen ka yanglua pa ya T20I asaya puti otsü nung half-century ka yangluba asayar tanobusang kümogo.

Dharmendra mapa nungi anentsüh khanga Guwahati nung longkak ait**Guwahati, Chiteni/July 23**

(Agencies): Union Education Minister Dharmendra Pradhan mapa nungi anentsü akhangtsü aser activist Sonam Wangchuk o longkak aita aliba kaketshirtem pusema Guwahati kübok Chachal tesem nung Brehostibarnü nisung aika adenshia liasü.

Cockroach Janta Party (CJP) kübok ayongzükba longkak aitba sentong nung Assam aser Northeast kübok tesem balala nungi nisung 10,000 dak tema adenshia liasü, ta sentong ayongertemi ashi.

Longkak aitertermi BJP-i aniba Centre sorkar anema yimyim ayim aser tatidang inyakyim nung aibelen menaba

atema khuret abentsü aser New Delhi nung longkak aitertermi dak police-i tashiyim amshiba anema takhangba balala agüja liasü.

Placard aser banner tem bener longkak aitertermi ashiba agi, parnok CJP indang "Chalo Sansad" march mapang police temi azükba kaketshirtem pusema nokdaker. Parnokisa shisaluyim nung temelenshi bener arutsü aser tatidang paper aiben leak asüba atema Pradhan mapa nungi anentsü takhangba agütsü.

Wangchuk-i anir linük ajunga nung movement ka tenzüker aliba mapang Guwahati nunga iba longkak aitba sentong ya ayongzuka agiogo.

Wangchuk ya police-i Honibarnü Jantar Mantar, New Delhi nung CJP pur longkak aitba tesem nungi agin aser mozükidangi anir, kong pa maneni lumia longkak aitar.

Kasa mapang nung Ato Kilonser Narendra Modi-i Brehostibarnü X ajanga tatidang paper mapangshia leak asüba süoki ia bilemba lemsatepogo.

"Lanurtem tarutsü dang nungi tanga tongtibangba kecha mali," ta PM-i zülutsüba den papet leak asüba ken o obendangtsü aser aibelen alirtem nem temerenshi agütsütsü atema fast-track court tem amenoktsü atema sorkari telemtetba agiogo, ta metetdaksü.

Kuki CSOs-i tezüluba nung takhangba ka agütsü**Imphal, Chiteni/July 23**

(Agencies): Ukhrul nung Kuki Civil Society Organisations (WKCKCSOs) Working Committee-i district administration nem tezüluba nung takhangba ka agütsüogo. Parnoki ashiba agi, Kuki-Zo nung aliba tesemtemi tenüngdakba oset belener aoba gari anirtem nem maneni tenokdangba agütsü, asadanger aser amaker.

Committee-i ashiba agi, Litan, Yaingangpokpi, aser Lamlai nung police tem yoker liaka item tatalokbatem ya maneni ataloka arudar. Parnokisa, ketdangsürtemi Kuki-Zo nung aliba tesemtemi tenüngdakba khu bener aoba garitem kümzüka meyutsüteter, ta ashi.

WKCKCSOs-isa, security escorts agütsüba mapang bendanga amshiba ashishiogo.

Sorkari state nung tanga kin ana atema tenüngdakba khu belenertem nem teküzmükba agütsür, saka Kuki-Zo nungertem nem kasa security magütsür, ta committee-isa shisem.

Khu belenertem lendong nung aliba süoki ia bilemba indang jembiba mapang committee-i, Ukhrul, Imphal East, aser Kangpokpi district administration tem dang tenüngdakba osettem kecha tetsükdaksü makai belendaksütsü mepeshia liasü.

Maneni Kangpokpi nung Kuki nung lakti tentettem den angatettepa July 24 nü senden ka amentsü, kong tensa asadangtsü aser parnok takhangba mataloktsüra kechi jenjang agitsü iba indang telemtetba ka agitsü, ta kasa sangdong ajanga metetdaksü.

Kuki-Zo nung timba aliba

tesemi tenüngdakba oset balala belener aoba nung tetsükdaksü adokba mapang iba takhangba ya agütsüogo. National Highway-2 (Imphal-Dimapur) asre National Highway-37 (Imphal-Silchar) nung Naga nung lakti tentet balala aser Foothills Naga committee nungeri tenokdangba agütsür aliba ajanga chiyongtsü, totzü, mozü aser tanga tenüngdakba osettem belenshiba nung tetsükdaksü adoker lir.

Lenmang nokdang aliba lakti tentettemi ashiba agi, Kuki nung telungpurtemi Naga nung civilian tem tepsetba anema iba tenokdangba agütsüogo.

Lenmangtem mapang talangka nokdanga ayuba ajanga Kangpokpi amala district tem nung osetsüset agi anünga kümogo aser iba atema kin balalai kati ka dak tai tongloksütetpa arudar.

Sikkim: Teesta Stage VI tunnel chirepba nung asür 22 jungogo**Guwahati, Chiteni/July 23**

(Agencies): Sikkim nung NHPC Teesta Stage VI Hydropower Project kübok tunnel ka chirepba nung asür 22 jungogo, aser tunnel nung samar alirtem maneni bushidar.

Agency aika meyokteper tunnel telung nung ayaterem tashi teküzmükba maparen balala benoka inyakogo.

Ketdangsürtemi ashiba agi, ali telung nung inyaksangshitsü kanga tasak süaka teküzmükertemi anibelem mesasai ayaterem tashi mapa

inyakogo.

Bodhbar aonung 10 ako shi nung Eastern Coalfields Limited (ECL), Asansol nungi rescue team tanabuba iba tesem tonga aru aser mapa tenzüka liasü. Team tasenba ya tanga specialised rescue unit tem den külemi inyaksangshi tenzüko.

Ketdangsürtemi ashiba agi, specialised equipment aser technical expertise tem amshia agency balala tangatettep nung inyakdar.

Sikkim sorkar district

administration aser ken o dak sendaka aliba tanga department temi iba inyakyim kanga junga achayangdar aser rescue team tem nem tenüngdakba logistical aser technical teyari agütsüdar. Ketdangsürtemisa, lendong agi kongshir aliba kibongtem nem tenüngdakba teyari agütsüdar, ta metetdaksü.

Tunnel nung sabanga aliba tanüingba nisungtem magitet tashi teküzmükba maparen maneni benoka inyaksü, ta ketdangsürtemi ashi.

France nung heatwave agi nisung asüba 21,674 lir

Paris, Chiteni/July 23 (Agencies): France linük tesem balala nung June ita tatemlen heatwave tesashi agi kongshia nisung 5,764 tali asü, ta linük indang public health agency ajanga sangdong ka nung ashi.

Iba sangdong ajanga ashiba agi, June 17 aser July 2 tsüngta nisung 21,674 asü, aser iba kasa mapang nisung 15,910 shi asütsü imla aliba dang shilem 36 agi timba asüba lir.

Health ketdangsür temi ashiba agi, iba ya "excess deaths" nung ajemdaker lir, aser iba ya tamale asüba average den medemdangba lir.

Nisung asüba ajakbo heatstroke agi masü, saka kanga tatsük nung mapang talangba aliba ajanga temulungjang, tepokbok aser tezüng nung timtem alirtem

tamajungba kumdaktsür aser asüba tali akumer, ta mongin temi ashir.

Iba figure tasenba ya 'complete mortality data' nung ajemdaker lir aser tan ita tetenzüklen nisung 2,000 shi tali asütsü ta asadangtetba sangdonga aliba dang kanga agi timba lir.

Heatwave ya teintet rogotem asoshi tamajungtiba lir, aser asürem timba parnok lir.

Nisung tali asüba shilem asem nung ana jungnua arishi küm 75 aser tema alirtem, asür tesadang jungnua mozüki nung asü, aser tanüngba ya nursing homes aser pei kidang asüba lir.

Paris (Île-de-France) region nung imlaba dang nungi 2,000 jungnua tali asü, anungji linük nung iba tesem nung timba asüba jangjar.

June 25 aser 27 tsüngta temperatures ya tesashitiba liasü aser iba mapang asür timba liasü.

Health tsütsü takotet nisungtemi ashiba agi, asürtem ya kodanga heatstroke agi masü saka mapang talangka tatsük nung aliba ajanga temang nung timtem balala adoka asüba lir.

Europe tesem aika nung tatsük ya tang talangba alir ta jembiba mapang France indang osang ya angur. Ibai tzü mopung melenba ajanga lir ta scientists temi ashir.

2003 heatwave mapang nisung 70,000 dak tema asüba sülen European linüktem nung heat-health warning systems tashi itshiaka tang tesüsa nisung asüba data yagi region nung public health asoshi alima atsükba ya tebilemtsü tulutiba rongnung ka ta sayur.

MULUNG NEN O



ASO:
31.03.1931

ASÜ:
08.06.2026

Onoki teti meima aliba Ojala asür Lt. Mrs. RENTINUKLA (Kangtsüng) la Yisu-i jar aodang kiyonger, yimer yimsanger, Arogo aser lokti palala shirnokisa nübu rongsen aser sarasadem agi yariogo nenok ajak dang iba sapang ajanga tepela lemsateper.

~ Temeim jabaso, jala, semchir,
anükapang aser kinunger.

ALI TAYOKTSÜ LIR

SM Colony Dimapur, City College anasa. Ali takong 4884 sqft.
Price Rs. 1300 per sq. ft (Negotiable)
Contact No: 8974571416 / 8798119488



Tzümetsüng sülen tashidak wara nungi kümzüksü atema kechisa inyaksüla ?

Tzü nungi menaba tashidak (typhoid, temang metabas, leptospirosis amala) aser Merila ama nungi menaba tashidak (ramen, dengue) amala tashidaktem ya tzümetsüng sülen tali pokteter.

Anungji, item tashidak nungi kümzüka alitsü atema item ya inyakang :



Tzü tajung
jemang



Tzü yua aliba
mamshidang teka
merükma-ang



Chiyongtsü mena
suang aser
temperature shitak
nung yuang



Chiyongtsü
tamajung
anepalua
endokang



Chiyongtsü
machi dang
teka metsükang
aser
metsümeshir
külen teka
shitokang.



Tanurtem
motzü nung
tesenzüdaktsü.



Merila
mepoktettsüsa
temeket
merüka yuang



Ramen aser
Dengue agi
meshirangtsüsa
merila sü
amshiang.



Chiyongtsü
tashi aser
tzümetsüng
nung metenba
chiyongtsü
endokang.



Shirangner
amai kümra
Doctor
ajuruang.




Department of Health & Family Welfare
Disaster Management Cell
Government of Nagaland



National Programme
on Climate Change
and Human Health

Greece nunger forward Tzolis Arsenal nung denogo



Chiteni/July 23, 2026

(Agencies): Arsenal-i Club Brugge nung Christos Tzolis pound million 34 agi alizükogo.

Arishi kum 24 tain Greece nunger international asayar ya Premier League champions Arsenal nung denogo aser osang ajanga ashiba agi, pai mapang talangka atema tenangzüktepba yangluogo.

Club Brugge nungi asayaba mapang Tzolis-i asaya 108 nung goal 43 idaktsü aser assist 45 süja liasü.

Iba ita tetenzüklen Belgium forward Leandro Trossard Besiktas nung oa adenba sülen

pa Arsenal nung denogo.

"Christos tabelen lenang asayar, saka pa tejaklen tesem ajak nung asayateter," ta Arsenal sporting director Andrea Berta-i ashi.

"Pa tetsüng anapronglai goal idaktsüteter, asayartem kanga junga belentoka asayateter aser pa dak technical ability kanga lir.

"Taoba season asem nung Christos-i goal aika idaktsüba dang masü assist-a aika sütsüogo aser pai onok indang squad indang technical jenjang ajungkettsütsü aser tashi tasen bener arutsü," ta paisa shisem.

Tzolis shiba PAOK nungi career tenzüka liasü, pa 2021 nungi 2024 tashi Norwich nungi asayaba mapang asaya 30 nung asaya aser goal asem idakja liasü.

Norwich nung asayaba mapang pa Twente aser Fortuna Dusseldorf nati loan nung oa asaya aser iba sülen Club Brugge nung aden.

Tzolis, Premier League nung mezüngbuba asaya ya 2021 kum Septemer ita Arsenal den asaya, koba parnoki goal 1-0 agi mekoki liasü.

"Küna club, kü taküm, kü sentong aser team indang ajak jembiogo," ta pai coach den sensaksemba indang ashi.

"Ni indang indanga asayaba asayar ka lir aser ni goal idaktsütsü mesüra assist asütsü atema asayar, aser aji attacket aser winger ka ama kü tangatetba lir.

"Ni goal idaktsünüa dang alir mesüra tatembangbuba pass kü team-mate tem nem agütsüner. Ni team atema meranga inyaker aser defence nunga shilem agir," ta Tzolis-i ashi.

Newcastle-i Bamba atema £34m agütsütsü mulunga agizükogo



Chiteni/July 23, 2026

(Agencies): Newcastle United-i Monaco midfielder Aladi Bamba atema pound million 34 tashi agütsütsü mulunga agizükogo.

Arishi kum 20 tain France nunger asayar, shiba 2025 kum mezüngbuba senior game asaya liasü, pa Brehostibarnü temang tendangtsü aser tenangzüktepba nung sign asütsü Tyneside togogo.

Newcastle-i, taoba ita Sandro Tonali Tottenham dang yokogo aser Ajax nungi arishi kum 18 tain Sean Steur alizükba sülen parnok midfield nung asayatsü asoshi ano lanur asayar ka bushia liasü.

Parnoki Freiburg nungi Johan Manzambi alinüa liasü, saka pa taoba hopta Aston Villa nung denogo.

Ligue 1 midfielders shirnok toba season minute 500 asayaogo, parnok rongnung Bamba ya duels won (9.1 per game on average), tackles

(3.6), successful take-ons (1.6) aser aerial duels won (1.9) nung top 5 nung liasü.

Bamba alizükba ajanga Newcastle puri parnok inyakyim melenshiba sayur. Club-i taoba kum Brentford nungi arishi kum 29 tain forward Yoane Wissa pound million 55 agi alizükba ama asayar tain asoshi sen mintoktsü merangdar.

Newcastle-i tang transfer window nungbo arishi kum 20 aser tekübok aliba asayartem dak rangloker jenjang agidar.

Steuer, Ewen Jaouen aser Bazoumana Toure nunger ama Bamba-a Premier League nung junga asayatetsü atema mapang agitsü.

Temetetsü kaji Bamba ya Monaco nungi asaya 12 nung dang tetenzük nungi asayar lir.

Ajisüaka Newcastle-i iba amala asayar tajung ka malizükteni maküm tsüngda jenjang agitsü asoshi telemtetba agiogo.

Mark Van Bommel, Belgium Coach akümtsü



Chiteni/July 23, 2026

(Agencies): Taoba mapang Netherlands midfielder Mark van Bommel, Belgium national team coach akümtsü renema lir, ta media osang balala ajanga Bodhbarnü metetdaksüogo.

Van Bommel aser Belgian football federation (RBFA) na tangatettep ka dangi aruogo aser arishi kum 49 tain taoba mapang asayar den ya taruba anogo ishika tsüngda tenangzüktepba yanglutsü. Pa lenisüba nung Belgium team Euro 2028 tashi asayatsü, ta Flemish daily Het Laatste Nieuws-i metetdaksü.

2013 kum asaya nungi anisüngzükba sülen Van Bommel ya PSV Eindhoven, Wolfsburg aser Antwerp indang coach inyakogo.

2024 kum June ita Belgian top-flight club Antwerp toktsüba

sülen Van Bommel ya club ka den danga sendaktepa maliasü. Pa lenisüba nung 2023 kum Antwerp puri kum 66 sülen mezüngbuba league title bena liasü.

2010 World Cup finalist yagi Rudi Garcia melentsü, shibai Belgium pur World Cup nung quarter-final nung tsükba sülen Hombarbarnü mapa toktsüogo.

Local media sangdong balala ajanga ashiba agi, France nunger coach aser asayartem aika aser technical director Vincent Mannaert nunger mangatettep nung liasü. World Cup nung group-stage mapang asayar kar junga masayatetba atema Mannaert mepelai liasü.

Rudi Garcia-i Belgium coach mapa ya 2025 kum January ita agizük aser pa lenisüba nung team asaya 20 asayaogo. Asaya 20 nung Belgium-i asaya 12

akok aser ana nung dang tamakok ngua liasü.

FIFA World Cup 2026 nung Belgium team Garcia lenisüba nung asaya trok asaya aser asaya ka nung dang tamakok angu. Parnoki quarter-finals nung Spain goal 2-1 agi mekoki liasü.

Belgium coach mapa magizük tsüngda Garcia ya Napoli, Al Nassr, Lyon, Marseille, AS Roma aser Lille nunger nunga inyakogo.

England nung 2027 WTC Final ayongzüka asayatsü

Chiteni/July 23, 2026

(Agencies): 2027 World Test Championship final (WTC) maneni England nung asayatsü, ta International Cricket Council (ICC)-i metetdaksüogo.

Tang agi pezübenbuba atonga England nung WTC final ayongzüka asayatsü lir. 2025 kum Lord's nung final nung Australia akokba sülen South Africa pur parnok indang title defend asütsü asoshi tang asayaba mapang ka lir.

Ajisüaka 2027 kum final ya Lord's nung masayatsü, kechiyong iba ground nung pitch dak sendakba nung tashishiba kar adokogo. London nung Oval Stadium ya WTC final ana ayongzüka asayaba mezüngbuba ground akümtsü. Iba ground nung 2023 kum Australia aser India na final asaya liasü. Iba tetezü WTC final pezü rongnung asembo London nung asayaogo.

2025-2027 WTC final ya June 9 nungi 13 tashi asayatsü. Final ya 2027 IPL temli aser 2027 Ashes asayatsü anogo pongu lia asayatsü.

2021 kum mezüngbuba final ya Southampton kübok Rose Bowl nung asaya, kong New Zealand-i India koka liasü. 2023 kum Australia-i Oval nung India akok aser 2025 kum South Africa-i Pat Cummins-i aniba Australia team koka liasü.

Tang tashi nung WTC nung Australia aser South Africa na temaba jenjang nung lir asünung taruba küma team ana ya final asayatsü imlar. Ajisüaka team anaprongla ano asayamung asem pezüka asayatsü lir

asünung taruba ita teku tsüngda temelenshi adoktsü akok. Australia aser South Africa na taküm kum tatemlen Test asem asayatsü lir.

ICC-i WTC final indang osang agütsüba sülen England and Wales Cricket Board (ECB)-ia 2027 season atema kidang asayamungtem sangdongogo. Teburtem Ashes asayamung June 18 nungi August 2 tashi Trent Bridge, Lord's, Edgbaston, Southampton, aser The Oval nung asayatsü. Kasa mapang nung kum 27 lir Bangladesh team-a May 23 nü nungi tenzüka Lord's nung England den Test ka asayatsü lir.

BILEMDANGANG

"Kodang nai nü jakla melenshir, idangji nü mapa melenshir aser ano idangji nü taküm melenshir."